

Dios òf Polis na Kada Skina

E eskalashon di kriminalidat na nos isla tin nos tur preokupá. Nos ke solushon pa e problema. Skuchando e charla aki, e punto di bista aya, nos ta forma opinionnan kiko mester sosodé.

Un solushon ku frekuensia ta vosiferá ta mas polis. Sin duda, ku polis na kada skina di kaya, kriminalidat lo baha!

Ma nos mester ta realistiko. Finansiamentu di un plan asina ta karísimo. Asta si nos ignorá e peso ekonómiko, nos tin ku puntra nos mes si nos di bèrdat ke biba na un pais ku polis na kada skina. Talbes nos ta kere ku nos ta dispuesto pa aseptá esei, basta ku nos por drumi trankil anochi sabiendo ku nos bidanan i poseshonnan ta protehá. Ma di otro banda, polis na kada skina ta un forma di gobernashon dor di intimidashon...produciendo imagennan mental di diktadura, un gobièrno ku ta silensia oposishon polítiko dor di forsa bruto. Esei ta loke nos ta deseá?

Lord John Acton tabata un gran historiadónan di siglo 19, respetá pa su koleganan pa su abilidad intelektual. Talbes e ingles aki ta mihó kòrdá pa su dicho famoso, “Tur poder tin tendensia di kontaminá, i poder apsoluto ta kontaminá apsolutamente.” Ma poko hende ta realisá kon Acton a pensa ku un pais por evitá poder apsoluto.

Su solushon: religion.

Acton a argumentá, “Ningun pais ta liber sin religion. E ta krea i fortifiká un sentido di deber. Si hende no komportá nan bon pa motibu di deber, esei lo mester sosodé dor di miedu. Mas nan ta evitá maldat pa motibu di miedu, ménos liber nan ta.”

E lógika di Acton ta irefutabel. Religion ta krea un sintido di deber den e suidadano. E ta duna e motibu pa obedesé lei, nenga propio interes, i sakrifiká pa otronan. Ma si suidadanonan bandoná religion òf si religion ta den un estado di dekadensia, e sentido di deber ta pèrdè su grap firme riba nan. Resultado di esaki ta krimen, desòrdu, i otro ilegalidat. Mas trastorno ku un komunidad ta pasa den, mas su gobernantenan i suidadanonan desesperá ta sklama pa akshon riguroso, den forma di mas polis.

Pues, segun Acton, si suidadanonan no ta gobièrná nan mes dor di birtut interno nan lo mester ser gobièrná dor di forsa bruto eksterno. Un nashon ku ta bandoná—ni siña nan yunan —normanan di Dios, tin mester di mas polis. **Un komunidad ku ta rechasá Beibel eventualmente lo enfrentá bayonèt.**

Sin duda, suidadanonan por tin un sentido di deber pa otro motibu tambe. Por ehèmpel, ora nos ta kòrda esnan ku a sakrifiká, dramando nan sanger, pa nos por gosa libertat, nos ta realisá ku nos tin deber pa komportá nos siertu manera.

Ma tin poko gratitut p’è sakrifisionan di nos antepasadonan awendia. Ta parse ku apresio pa loke nan a hasi tin ningun klase di afekto riba bida di e generashon aktual. Acton tin rason: **e úniko fuente sigur di un sentido di deber ta religion.**

Skritura santu ta deklará, “*No tin ningun kriatura skondí pa Su bista, ma tur kos ta habrí i bisto dilanti di wowo di Esun ku nos tin di aber kunE*” (Hebreonan 4:13). Dia ta bin ku nos tin ku para dilanti Dios i duna kuenta. “*..Señor..lo trese na kla e kosnan skondí den skuridat i deskubrí e intenshonnan di kurason di hende...*” (1 Korintionan 4:5). Kòrdando ku Dios ta omnisiente—ku E ta mira i ta evaluá kada echo, palabra, òf pensamentu—ta motivá nos pa ahustá nos komportashon.

Kristianismo ta duna un otro motibu pa komportá korekto pa motibu di gratitut. E pèrsona ku konosé e alivio, alegria, i libertat di pikánan pordoná dor di e Yu di Dios, no ta lubidá fásilmente Su sanger dramá na nan lugá. “*...tempu nos tabata pekadó ainda, Kristu a muri pa nos*” (Romanonan 5:8).

Sin e sentido di deber, nos ta kore e rísiko di eksperensia bida den un estado ku polis na kada skina. Segun Acton, **nos lo ta gobièrná pa deber...òf dor di skopèt.** Ta keda na nos pa skohe kua nos ta deseá.